

**Kinwaati ki Pɔɔ tɛ tsɛɛ li kintaashe
ki
Kolosi-i
Fiee fi nuun ɛ Kinwaati ki
Kolosi kini-i**

Pɔɔ tɛ tsɛɛ kinwaati kini li kintaashe ki beniin be kimbeenche-ɛ li kitoŋ ki Kolosi-i. Epafraŋ tɛ dza be be ntoŋ wumu wu bifi kii kintaashe kilu. Pɔɔ se tuu tsɛɛ kinwaati kini li kintaashe kilu-u ki tɛ nuun li kimbe ki tɛ ŋiŋgi le kemi le ni bichi ɛ ki-i. Tɛ tsɛɛ le leeki ntiife nuun wu cheeŋ wu nuun kii beniin be nuun be Krai.

Bikoo bi biee bi ɛ Kinwaati kini-i

1:1-8 Mbɛɛche

1:9-2:19 Kii wi wu nuun Krai mɔɔ nime chee

2:20-4:6 Ntse wu fweŋ wu nuun li Krai li

4:7-18 Ben'yɛeshe

¹ Ɛ mi Pɔɔ, ŋwane ntoŋ wu Krai Jiso li kɔŋgise wu Nyɔ-ɔ. Mio tɛ Timoti wu ŋwaanɛŋ wuseŋ.

² Kinwaati kini giingi keɛ li beŋ beŋwaanɛŋ beŋɛŋ be Kolosi-i, beniin be nuun be Nyɔ-ɔ, be lemi mk-paan li Krai li. Nyɔ Baa wuseŋ doonche beŋ shɛŋ yi dzeen, yi tuu nye beŋ mbeɛŋgii.

Pɔɔ leki li Nyɔ-ɔ nyɛɛ kiyɔɔni kii beniin be Kolosi

³ Tɛ beɛ fe tɛ leki li Nyɔ-ɔ kii beŋ mfi kwi, tɛ nyɛɛ neɛ nuun kiyɔɔni li Nyɔ-ɔ yi Te Taa wuseŋ wu Jiso Krai,

⁴ kifε tε woo baa kii shén yinε yi nε gεε li Krai Jiso-o, bε kin̄k̄ongisε ki nε kεm̄i li bēniin̄ bεchu bε nuun̄ bε Nyɔ-ɔ.

⁵ Tε kii le nε feti lε kifε nε bichi baa limfwe nuun̄ li fiee fi Nyɔ nachε yε yi gεε li be-en̄ liboo. Fiee fini se nuun̄ fi nε tē woo kitun̄ lε jε yi chεen̄ li, yi nuun̄ nton̄ wu dzeen̄.

⁶ Nton̄ wuni tē bε li be-en̄ nεε yεen̄ si wu bεε li bēniin̄ li, li kikoo ki nshε-ε kichu fikisi ntse wu bēniin̄ wu se tuu wu saangini wu giingi limfwe limfwe. Fi fiεε nεε tε yεen̄ si fi tē ka bε ben̄ mbεεche jobε chi nε tē woo nton̄ wulu nε tuu nε kεε tε chεen̄ chεen̄ le Nyɔ doonche yε shén yee yi dzeen̄ li bēniin̄ li.

⁷ Nε tē woo wuni nton̄ li Epafra wu nuun̄ shén yisen̄, tεε be nindi li fiee fimumkpa-an̄. E wi wu nime wu Krai, wu se dzɔ ɔ kintsii kisen̄ se nindi bε shén yee chi.

⁸ Wu teeɔ bee kitun̄ kii kin̄k̄ongisε ki Fiana yi Nyɔ fε nε kεm̄i li bēniin̄ li.

⁹ Mbεεche jobε chi tε tē woo kii ben̄ lε, tε mεen̄ baa ki chikε kε nlekε li Nyɔ-ɔ li be-en̄ kε. Tε lεki li Nyɔ-ɔ tε lεki le Nyɔ yiiki ben̄ bε bufii nge le nε kεε fiee fi yi wεki. Fini gii fi ka li bufii buchu-u bε biee bi Fiana yee fε nε kii.

¹⁰ Bεdεeni nε se ni nε tsiin̄ ntse nuun̄ wu kɔche fε Taa li, nuun̄ wu wu gbengī K̄ongisi. E nε tsiin̄ lε nε se ni nε nindi nime chi dzeen̄ lε dzé lε dzé, nε ni nε kuu nε giingi limfwe limfwe li fiee fi nε kii kii Nyɔ-ɔ.

¹¹ Tε lεki li Nyɔ-ɔ tε le Nyɔ yi bunga bu nɔ̄ɔa buchu nuun̄ bwee nyε ben̄ bunga buchu le nε se ni nε tεemi mfi kwi, nε kendi shén nε giingi limfwe li fiee li fichu, bε kin̄εetinε,

¹² nɛ nyɛɛ kiyɔɔni li Baa wuse-ɛŋ. Ɛ yi yi giɪ yi fɛ tɛɛbenj tɛ kɔchɛ le ke tɛ naa tɛ kɛmɛ fiee fi yi nachɛ yi gɛɛ li bɛniɪŋ bɛ nuuŋ bee li fɛ bumfɔŋ bu kin'wofu-u.

¹³ Yi buu yɛ bee li tsan yi bɔŋga bu kijibɛ-ɛ, yi gɛɛ bee lɛ bumfɔŋ bu Nwani wu nuuŋ shɛn yee.

¹⁴ Nwani wuni ɛ wu wu yi ka li wu-u yi se sonde tɛɛbenj li tsaan yi nge yi nuuŋ mfekisɛ wu bibifi bi tɛɛbe-ɛŋ.

Krai nuuŋ kikoo ki biee bichu-u

¹⁵ Nwani wuni kɛmi mbose yi Nyɔ yi tɛɛbenj nɛŋi yɛ kɛ. Ɛ wu wu nuuŋ mbiɛ wu nɔkosi li biee bichu bi bɛ tɛ tɔ-ɔŋ.

¹⁶ Nyɔ tɛ tɔŋ biee bichu kɛti li tsan yee li, biee bi liboo bɛ bi laanɔkwiɪŋ, bi bɛ nɛŋi, bɛ bi bɛ nɛŋi yɛ kɛ, mɔɔ nuuŋ bɛnɔchindaa bɛ la, bɛ denɔŋi li mbaandze-e, mɔɔ nuuŋ bɛ kɛmi bɔŋga, mɔɔ nuuŋ bɛnɔŋa bɛnɔŋa, mɔɔ nuuŋ bɛ seki. Biee bini bichu nuuŋ ɛ Nyɔ yi tɛ tɔŋ kɛti li tsan yee li, bi nuuŋ li Wu-u.

¹⁷ Tɛ nuuŋ lu kituŋ biee bichu se nuuŋ. Ɛ wu wu kɛmi biee bichu bi se taashɛ bi nuuŋ si bi nuuŋ.

¹⁸ Nuuŋ kikoo ki kintaashɛ ki bɛniɪŋ bɛ kim-beenchɛ-ɛ ki nuuŋ yi yee. Ɛ wu wu tɛ bɛchi kintaashɛ kini. Ɛ wu wi wu nɔkosi wu tɛ bo li kwe-e mɛɛŋ yɛ tuu kwi kɛ, le li fiee fichu-u ni nuuŋ nɔkosi.

¹⁹ Biee bini nuuŋ lɛ kifɛ Nyɔ tɛ wɛki le fiee fichu fi yi nuuŋ, ni fi nuuŋ li Nwani-i.

²⁰ Nyɔ se fɛ kɛti li Nwani-i le biee bichu, mɔɔ nuuŋ bi laanɔkwiɪŋ mɔɔ nuuŋ bi liboo bi kaari bi to bɛ yih yi Nyɔ. Yi tɛ fɛ nuuŋ kimaan bɛ nɔŋ mɛ Nwani-i le bɛ bɛ mbɛɛŋgii mfi wu tɛ kwi li kintaan li.

²¹ Li be-en, nε tε shiinj nε nuunj ε nε gate bε Nyɔ, nε kemi bembeeche bε bifi kii yi, si nε tε feti biee bibifi le.

²² Se nuunj le, dεeni Nyɔ kaari yε yi taashe bε ben li yi yi Nwani-i wu tε to wiwonj. Tε fε fini keti li kwe yee, le nε se ni nε nuunj yi limfwe nε wuuti nε kemi yε findzɔnj kε ngunu kε.

²³ Nε gii nε ni nε nuunj le ε nε ba nε giingi limfwe bε shɛnj yinε gεε li wuu, ε nε lii gεenj yinε nε lemi mkpaanj fiee sɛɛsi yε ben li fiee fi nε bichi limfwe li fi-i fi nε tε woo li ntonj wu dzeenj li kε. Ntonj wu dzeenj wuni nuunj wu bε feenji baa kitunj li wi kwikwi li nshe yini-i. E ntonj wuni wu mi wu Pɔɔ nnuunj wi wu nime li wu-u.

Nime chi Nyɔ tε nye li Pɔɔ li

²⁴ Nekɔɔ dεeni li bεnge ben bε njingi kii be-en. Ndzetɔɔ bεnge bani li kikoo ke-en le le n'yiiki bεnge bε Krai tε njɛnj kii kintaashe ki beniinj bε kim-beenchε-ε ki nuunj yi yee.

²⁵ Nyɔ gεε yε mi le ni nindi li kintaashe ki beniinj bε kimbeenchε-ε, ni mfenjisi jε ye li be-en si yi nuunj chichi.

²⁶ Jε yini nuunj yi tε shiinj yi nuunj ε bε tε nyike li kingɔkε ki beniinj le kichu li biya bi lindɛeri, dεeni yani Nyɔ doonche yε li beniinj bε nuunj bee li.

²⁷ Nyɔ tε tsaa le yi fε beniinj bee bani kεε le beniinj bε nuunj yε Bɛjuu kε gii naa be kεmε bunɔja nge bu ntonj wu bε tε shiinj bε nyiki wuni-i. Ntonj wuni nuunj le Krai wε li yi yinε-ε. Bεdɛeni nε se bichi baa limfwe le nε kεmε bunɔja.

²⁸ E Krai wulu wuni wu tε fenjisi kii wu li beniinj bεchu-u. Tε tiifi be bε bufi buchu bu Nyɔ nye li bee

li, tɛ tuu tɛ nyɛɛ be ntifi le tɛ se fɛ be ni be nuuŋ ɛ be ta be kɔɕɛ lɛ Nyɔ lii si bɛniɪŋ bɛ Krai lɛ kɛmi le be ni be nuuŋ.

²⁹ Ɛ nɛɛ fi fi ntɛɛndi muɲaɲa, nindi bɛ bɒŋga buchu bu Krai nindi li yi yɛ-ɛŋ.

2

¹ Nse ŋ'wɛkɔɔ le mfɛ beŋ bɛ Kolosi kɛɛ si ŋgwɛninɔɔ ŋge kii beŋ, mɔɔ kii bɛniɪŋ bɛ Lawdesia bɛ bɛniɪŋ bɛ kimbeenche-ɛ bechu bɛ mɛɛŋ baa saa ki ŋɛŋ kɛ mi lɛ lii kɛ.

² Mfetɔɔ ni le shɛŋ yinɛ bɛ yibe ni yi yuusi, nɛ taasɛ nɛ ni nɛ nuuŋ li kinɲɔŋgise-ɛ, le nɛ ni nɛ gbɛŋgi nɛ kii bieɛ bichu bujɔŋ si wi kɛmi le kɛɛ, le se nɛ tuu nɛ kɛɛ tɛ munyiikɔɔ mu Nyɔ-ɔ mu nuuŋ krai.

³ Nyɔ nyike yɛ fikoo fi bufii buchu-u bɛ bieɛ bi bɛniɪŋ kɛmi le be ni be kii, kii yi nuuŋ li Krai.

⁴ Ntiitɔɔ fini le kiɪŋ wi wumu ni tuu dza bɛ bɛ n'yɔru wu yiki lɛwa lɛwa le ni yɛŋgi beŋ lu kɛ.

⁵ Nɛ ni nɛ kii le mɔɔ si nnuuŋ yɛ lɛ be-ɛŋ lɛnti kɛ ni, miɔ nɛɛ tɛɛbeŋ li fiana-a. Nnɛkɔɔ si ŋɲɲgi nɛ feti bieɛ lɛ dze yi tsaan li, mɔɔ si nɛ giki shɛŋ li Krai li yi tɛɛmi ŋge.

Bɛniɪŋ bɛ krai lɛ bɔnɛ baa li tsan yi bɛnchi bɛ lɔɔlɔɔ

⁶ Si nɛ fi baa Krai Jiso le nuuŋ Taa lɛ, nɛ ni nɛ tsiɪŋ li wuu nɛɛ lɛ.

⁷ Lii yɛɛŋ gɛɛŋ nɛ ni nɛ kuu li yi yee li, nɛ lemi mkpaan li kimbeenche kinɛ-ɛ nɛɛ si bɛ tɛ tifi beŋ, nɛ nyɛɛ kiyɔɔni li Nyɔ-ɔ weseɛŋ.

⁸ Nɛ ŋɲɲgi yɛɛŋ le kiɪŋ wi ni dzɔɔ bufii bu kilɛɛ bu laanɲkwiɪŋ bu kinɛɛ lɛ liɪŋ beŋ lu nɛ to bɛmfɛ kɛ. Bufii buni nuuŋ bu biki nuuŋ ntɛ wu kwɛɛŋ wu

wiwonj mɔɔ bɛ bu fiana yi sɛki nshe yini.* Bu biki ye nuunj bu krai weki ke.

⁹ Ne ni ne kii le si Krai te to wiwonj, fiee fi Nyɔ nuunj fichu fiee li wuu.

¹⁰ Ne kemɛ baa biee bichu si ne taashɛ bɛ Krai le, ɛ wu kikoo ki biee bichu-u bi kemi bunga mɔɔ bi sɛki.

¹¹ Si ne tɛ taashɛ bɛ wu le, tɛ sɛɛ benj dzɔɔ. Nsɛwu dzɔɔ wuni nuunj ye si wu bɛ sɛeti bɛ tsan mfi wu bɛ sɛeti kintɔɔ li wi-i bwinj ke. Wuni nuunj wu Krai fe le sɛɛ nyan yine yi bwinj yi bibifi.

¹² Mfi wu bɛ tɛ lii benj lidzɔɔ bɛ tɛ taashɛ benj bɛ Krai bɛ diyɛ. Nyɔ kaari yi buu tɛ benj kii shɛnj yi ne tɛ gɛɛ li yi-i le nuunj buu tɛ benj li kwe-e bɛ bunga bu tɛ buu Krai lu li kwe-e.

¹³ Ne tɛ shiinj ne nuunj ɛ ne kwi li fiana-a kii benchi bɛ Nyɔɔ bɛ ne tɛ bonde, bɛ mɛɛn saa ki sɛɛ ke benj dzɔɔ le bɛ buu benj li biee bi nyan weki-i ke. Dɛɛni yani, Nyɔ kɔɔ ye yi fe ne kaari ne to lu, yi taashɛ benj bɛ Krai. Yi kɔɔ ye yi lɛɛshe bibifi bisenj bichu.

¹⁴ Yi lɛɛshe ye biee bi tɛ keeti bee le Kinwaati ki benchi-i bi bɛ tɛ tsɛki kii bee. Yi dzɔ ye biee bini bichu yi ta li kintan li.

¹⁵ Krai se bonyɔɔ bunga bu biee bi sɛki bini-i bichu, wu buu bi le waan, wu nyɛ bi buya, yi se ta bi li kintan li.

Beniinj bɛ Krai ni be wuki nuunj fiee fi tiiti

¹⁶ Bɛdɛɛni, kiinj ne ni tuu ne benj le wi ni sɛki benj kii biee bi ne jii bɛ bi ne wundi ke, ke le ne fe ke tsɔɔnj

* **2:8** Li jɛ yi Gri-ik feni nuunj fe nuunj le: Biee bichu bi li jobɛ-ɛ bi li nshe yini-i bi beniinj biki. Nuunj ɔ nɛn 2:20.

ke, mɔɔ nuuŋ tsɔnɔ chi kwii wu fwε-εŋ, mɔɔ le nε shiinj yε fe bu beshiinshi ke.

¹⁷ Be feti biee bini bi nuuŋ nεε si kinjiinjii ki fiee fi tɛ nuuŋ le fi gii fi bε, fiee filu kibεε nuuŋ Krai.

¹⁸ Kiinj nε ni beŋ le bɛniinj bamu ni be sɛki beŋ be tiiti le nε taŋ baa dze ke. Bɛniinj bani nuuŋ bε kwenji le nε ni nε shikisi yi yinε fɛkwiinj si be shikisi, nuuŋ yε le dze yi shaan li ke, be tiiti le nε ni nε nyεε ŋguŋu li bɛnchindaa bε Nyɔɔ si be ti guundi le. Be tiiti le be kii biee kifε be ŋingi biee le bifiee li. Be tsakisi yi li biee bi buti li be fa-a, kinyi kilu se nuuŋ yε lu ke.

¹⁹ Beeyε bɛniinj gatε baa bε Kikoo ki nuuŋ Krai. Krai nuuŋ wu nyεε bunga li yi yee li yi se kuu si Nyɔ nachε le yi ni yi kuu. Tε taashe baa nεε si yi yi wi ti taashi li bin'yoon li bε li ŋgii li bi se nindi bujɔŋ.

²⁰ Si nε kwi baa kituŋ beŋ bε Krai kimbe ki fiana yi sɛki nshε yini, ε kii la fi nε tuu tsiinj si bɛniinj bε li nshε yini-i? Nε tuu nε beenchi le nε ni nε biki bani bɛnchi kii la?

²¹ Be dzɛti be chini le, “Kiinj wi ni kemε li fini fiee li ke. Kiinj wi ni mɔŋ fini fiee lɛwa ke. Kiinj wi ni konj li fini ke.”

²² Biee bini bichu se nuuŋ bi bɛniinj feti bi kɛti bukaru kifε be biki bɛnchi bε bɛniinj gεε be biki nuuŋ si bufii bubee doonchi.

²³ Bɛniinj dzɛti be ŋingi le bufii nuuŋ li bɛnchi bani-i, si be kɛndi bɛniinj be doonchi dze le bɛniinj ni be guundi le, se nuuŋ yε le dze yi tsaan li ke, si be shikisi yi yibe mɔɔ ŋwɛwu bε yi. Se nuuŋ le, biee bini nuuŋ bi tε mɔɔ fi wi li biee bi bifi bi nyan yi bwinj kɔŋgisi ke.

3

Bəniin bə Krai kəmi ntse wu fwəŋ

¹ Si Nyɔ kɔɔ yɛ yi buu bəŋ bə Krai li kwe-e, gɛɛ yɛɛŋ shɛŋ yinɛ li bieɛ bi liboo li fɛ Krai nuuŋ ɛ Nyɔ shiiki wu lɛ kibɛnɛ ki yi-i ki kigɔŋɛ-ɛ.

² Nɛ gɛɛ bufii bunɛ li bieɛ bi liboo li. Kiin nɛ ni gɛɛ li bi laaŋkwiin li kɛ,

³ kifɛ nɛ kwi baa kituŋ, ntse wunɛ se wɛ dɛɛni ɛ Nyɔ nyikɛ bə Krai li yi yi Nyɔ-ɔ.

⁴ Mfi wu Krai wu nuuŋ ntse wunɛ gii busɛ, nɛ gii nɛ busɛ tɛ bə wu li bunɔŋa bwee li linti.

⁵ Fi fiɛɛ lɛ, nɛ lɛɛshɛ bieɛ si bini li yi yinɛ bi nuuŋ bi laaŋkwiin. Bi nuuŋ si bieɛ bi nyɛ-ɛŋ, mɔɔ yi yinɛ yi nyiŋini, mɔɔ kɔŋgisɛ mferu bieɛ bibifi, mɔɔ mbuushɛ lii li bieɛ li. Wi wu buushi lii li bieɛ li nuuŋ ɛ bieɛ bini to si nyɔ yimi fɛ wuu.

⁶ Ɛ kii ŋwaani bini bieɛ bi Nyɔ gii yi doonchɛ shen ye yi fuuti li bəniin bə feti bi-i.

⁷ Tɛ nuuŋ ŋkosi nɛ tɛ feti ŋwaani bini bieɛ mfi wu nɛ tɛ mɛɛŋ nɛ tsiin ŋwaani wɛɛ ntse.

⁸ Dɛɛni, nɛ kəmi lɛ nɛ chinɛ li bi bichu-u. Nɛ chinɛ li shɛŋ yi tɔnyi bə shɛŋ yi tsoo mɔɔ li shɛŋ yi bifi. Kiin wi ni bifisi bukoon bu wi-i kɛ. Kiin n'yɔru wu bifi ni buti lɛ wi-i wa kɛ.

⁹ Kiin wi ni yɛŋgi bə ŋwaani kɛ. Nɛ ni nɛ kii lɛ nɛ kɔɔ baa nɛ buu bwiŋ yɛ fichi bə kingɛ kilu,

¹⁰ nɛ lii nuuŋ kifɛŋ. Yini yɛɛ Nyɔ nachi mfi kwi yi fikisi yi tuu si yi, yi nuuŋ Kintɔmu, lɛ nɛ se gbɛɛŋ nɛ kɛɛ yi.

¹¹ Feni wi wumu ti nuuŋ yɛ chichi li wumu kɛ. Wi wumu nuuŋ yɛ lu lɛ nuuŋ wi Juu wumu nuuŋ wi Grik kɛ. Wi wumu nuuŋ yɛ lu lɛ bə sɛɛ baa wu dzoo

wumu ba kintɔɔ kɛ. Wi wumu nuun yɛ lu le nuun wi wu tɔɔ kɛ. Wumu nuun yɛ lu tɛ le nuun nyan yi tɔɔ kɛ. Nɛɛ lɛ wi wumu nuun yɛ tɛ lu le nuun mfwa wumu nuun yɛ mfwa kɛ. Krai nuun fiee fichu li bee li, tuu nuun li bee bɛchu.

¹² Si Nyɔ kɔɔ yɛ yi tsaa beɲ, nɛ se wuuti baa, se kɔŋgisi beɲ, nɛ keeti nshiɲ, nɛ feti biee bi dzeen, nɛ shikisi yi, nɛ nuun wɛɛ, nɛ kɛndi shɛɲ.

¹³ Nɛ ni nɛ dzeti wi bee wi si mwɛ nuun. Ɛ wi feti mɔɔ nuun la fi tɔnyi wi le, mwɛ feeki wu. Si Taa feeki bibifi binɛ, nɛ kɛmi le nɛ ni nɛ fekisi bibifi bi bɛniɲ bamu-u tɛ.

¹⁴ Nɛ feti biee bini bichu, nɛ giki kinɲkɔŋgisɛ limfwe. Kinɲkɔŋgisɛ nuun fiee fi taashi biee bichu bi se gbɛŋgi bi nuun li fiee fimumkpa-aɲ.

¹⁵ Nɛ gɛɛ mbɛɛŋgii wu buti fɛ Krai li ni nuun li shɛɲ yinɛ-ɛ wu doonchi beɲ dze. Mbɛɛŋgii wuni nuun wu Nyɔ teenyi beɲ le nɛ kɛmɛ si nɛ nuun yih yi mumkpaɲ. Nɛ nyɛɛ kiyɔɔni li Nyɔ-ɔ.

¹⁶ Gɛɛ yɛɛɲ jɛ yi Krai yi ni yi nuun li shɛɲ yinɛ-ɛ bujɔɲ, nɛ tuu nɛ tifi yi yinɛ bɛ bufii buchɛ. Nɛ yuuti nɛ nyɛɛ kiyɔɔni li Nyɔ-ɔ li shɛɲ yinɛ-ɛ bɛ juun yi buti lɛ Kinwaati ki N'yɔɔnchɛ-ɛ mɔɔ juun yimi yi n'yɔɔnchɛ, mɔɔ yi Fiana yee nyɛɛ li bɛniɲ li.

¹⁷ Mfi wu nɛ feti fiee fichu fi nɛ feti, mɔɔ nuun fi tɛfɛ mɔɔ nuun fi fɛɛɛ, nɛ feti li bukoon bu Taa Jiso-o, nɛ nyɛɛ kiyɔɔni li Nyɔ-ɔ Baa we keti li wuu.

Si bɛniɲ bɛ Krai lɛ kɛmi le be ni be tsiɲ li yi yibee

¹⁸ Bukɛɛɲ, nɛ nyɛɛ yɛɛɲ yi yinɛ li bunɲ bɛnɛ-ɛ. Ɛ fiee fi kɔchɛ le bɛniɲ bɛ Taa lɛ ni be feti.

¹⁹ Bunɲ, nɛ kɔŋgisi bukɛɛɲ bɛnɛ. Kiɲ nɛ ni ɲasini bɛ be kɛ.

²⁰ Bɔɔŋ, nɛ wuki li bɛna bɛnɛ bɛ bɛchaa bɛnɛ li fiee fichu-u. Ɛ nɛ feti lɛ, fi ni fi dzeen fɛ Taa li.

²¹ Bɛtɛ bɔɔŋ, kiin nɛ ni nɛ feti bieɛ bi shɛŋ tɔnyi bɔɔŋ bɛnɛ bu tɔnyɛ kɛ. Ɛ nɛ feti lɛ, shɛŋ kwi be.

²² Bɛmfa nɛ wuki li bɛtɛ bikoo binɛ-ɛ bi laaŋkwiin li fiee fichu-u. Kiin nɛ ni nɛ nindi li bee nɛɛ mfi wu lii yibe nuun li yih yinɛ le nɛ fɛ le yi ni yi dzeen bɛ bɛ bɛŋ kɛ. Nɛ nindi bɛ shɛŋ yi mumkpaŋ, nɛ chɛndi yɛɛŋ nuun Taa.

²³ Ɛ wi nindi fiee fichu fi nindi, nindi bɛ shɛŋ yee chi le nindɔɔ nuun li Taa li nuun yɛ li wi-i kɛ.

²⁴ Nɛ ni nɛ kii le wi gii kɛmɛ fiee fi bɛ nachɛ bɛ gɛɛ fi nuun kinsomfu kee nuun li Taa li. Ɛ Taa Krai wu nɛ nindi li wuu.

²⁵ Sɛ nuun le, bɛniin bɛ feti bubieɛ Nyɔ gii yi soon be li bubieɛ bu bɛ feti-i. Nyɔ ti doonchi yɛ chichi chichi li bɛniin li kɛ.

4

¹ Bɛŋ bɛtɛ bikoo bɛ kɛmi bɛmfa, nɛ feti bieɛ li bee lɛ dze yi tsaan li bɛ yi dzeen, nɛ kiimi yɛɛŋ le nɛ kɛmi baa tɛ Te Kikoo liboo.

Ntifi yi kimerise

² Bɛŋ bɛchu nɛ lɛki li Nyɔ-ɔ nɛ giinŋi limfwe nɛ fiɔɔŋ kɛ. Ɛ nɛ lɛki li Nyɔ-ɔ nɛ giki bufii nɛ nyɛɛ kiyɔɔni li yi-i.

³ Nɛ lɛki Nyɔ li bee li tɛ le Nyɔ gwiye kigoo li jɛ yee le tɛ ni tɛ fenjisi jɛ yini yi nuun munyiikɔ kii Krai. Fieɛ fiee fi nnuun li ncha-a kii fi.

⁴ Nɛ lɛki li Nyɔ-ɔ le ni mgbɛŋgi mfenjisi yi wuuti bujɔŋ si ŋkɛmi le ni mfenjisi.

⁵ Ɛ nɛ feti bieɛ bɛ bɛniin bɛ nuun yɛ bɛ kim-beenche-ɛ kɛ, nɛ feti bɛ bufii. Mɔɔ nuun mfi wu la

wu ne kemε le ne fe fiee, ne gwenε le ne fe fiee fi shaan li mfi wulu-u.

⁶ Tefe chine ni chi nuun mfi kwi nuun chi mbeengii, chi yiki si ntɔŋ, ne se ni ne kii ntusu fiee li wi kwikwi ε dze yi tsaan li.

Ben'yeeshe

⁷ Tichiku gii tee ben fiee fichu kii mi. Nuun ηwaani wuseη, nuun te shen yi teebeη. Tee be nindi li Taa li fiee fi mumkpa-aη se nuun wi wu nime wu nindi be shen yee chi.

⁸ Ntundɔɔ wu ε be-eη be mbeeche wu nuun le be fe ne keε si te nuun, tuu kaangi shen yine.

⁹ Ntundɔɔ bee Onesimu wu nuun wi wune wumu, tuu nuun te ηwaani wuseη wu nuun shen yi teebeη nindi li fiee fi Krai li mkpaan. Be gii be tee ben fiee fichu fi keti feni.

¹⁰ Aristaku wu tee wu baa li yih yi ncha-a feni yesɔɔ beη. Mak wu ηwaante Banaba yesɔɔ beη te. E wu wu ne woo baa nton kii wu. E wu be, ne fi wu.

¹¹ Jiso wu be teenyi le Justu yesɔɔ beη te. E neε beniin be betεtu bani kwaa be te nuun Bejuu be tee be nindi li fiee fimumkpa-aη li bumfɔŋ bu Nyɔ-ɔ. Be fi-i mi ηge, be feti te shen yen fufini.

¹² Epafra wu nuun te wi wune wumu, wu nindi li Krai Jiso yesɔɔ beη te. Mfi wu lεki li Nyɔ-ɔ mfi kwi kiimi beη neε ηge, lεki le Nyɔ fe ne ni ne lemi ne tee mi si beniin be ta kitun, be gbengi be kii fiee fichu fi Nyɔ weki.

¹³ Mi ηkɔɔ ɔ mi ηen be lii yen le nindɔɔ li be-eη ηge mɔɔ li beniin be Lawdesia be be Irapoli.

¹⁴ Luk wu wɔnchi beniin wu nuun nsan yiseη yi shen be Dema yeeshi baa te beη.

¹⁵ Nye yeeη n'yeeshe weη li beηwaanη besη be kimbeenchε-ε be Lawdesia, mɔɔ li Nimfa be li kintaashe ki beniin be kimbeenchε-ε be taashi fe wuu kuun.

¹⁶ E ne teen kinwaati kini, ne ntuumi li kintaashe ki beniin be kimbeenchε-ε ki Lawdesia be teen te, ne ηη te le be tuumi baa kinwaati ki nuun be be ne teen.

¹⁷ Ne tee li Akipu-u le ηη le wu mεeshɔɔ nime chi Taa nye li tsan yee li.

¹⁸ N'yeeshe wuni ε mi Pɔɔ wu ntsee be kwan weη. Ne kiimi yeeη le miɔ li ncha-a. Nyɔ doonche ye shen yee yi dzeen li beniin li.

Sari

Sari: Sari (New Testament+)

copyright © 2024 Wycliffe Bible Translators, Inc.

Language: Sari

Contributor: Wycliffe Bible Translators, Inc.

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

- You include the above copyright and source information.

- If you make any changes to the text, you must indicate that you did so in a way that makes it clear that the original licensor is not necessarily endorsing your changes.

- If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-04-26

PDF generated using Haiola and XeLaTeX on 25 Apr 2025 from source files dated 26 Apr 2025

0b48302f-d71e-5995-a8f4-98013bf8b3d2